

TEZAUUR LITURGIC

10 AUGUST

ACATISTUL SF. ARHIDIACON- MUCENIC LAURENȚIU DE LA ROMA



MOSCOVA, 2000



Акафист святому мученику архидиакону Лаврентию

Кондак 1

Избранный страстотерпче и угодниче Христов Лаврентие, архидиаконе и непобедимый во страданиях великомучениче, песньми похвальными величаем тя нашего в бедах заступника, выну предстоящаго златозарному престолу Царя славы; Ты же, яко огнем мучений вшедый в покой небесный, от огня страстей и скорби всякия свободяяй нас, во уповании тебе взывающих:

Радуйся, непобедимый великомучениче архидиаконе Лаврентие.

Икос 1

Архангелов и Ангелов чины, Серафимов и Херувимов собори, и всех горних безплотных сил сонмы вельми удивишася толикому мужеству твоему, великомучениче Лаврентие, яко в немощнем телеси человечестем безплотных сил явил еси образ, огнем бо на железном одре жегомый и испекаемый, всесожжение живыя жертвы Христу был еси. Сие пачеестественное и страшное для единого помысла человеческого терпение точию воспоминающе, содрагаемся, и

от всего сердца воспеваем тако:

Радуйся, великомучениче, огнем и железом к
небесному покою пришедый;

Радуйся, во архидиаконстем чине служащий
совершению Безкровныя Жертвы, и сам всего
себе в жертву Христови принесший.

Радуйся, адаманте, ничим же одолеемый и не
побежденный.

Радуйся, каменю веры, на недвижимем
основании заповедей Господних утвержденный.

Радуйся, егоже подвигом дивящися горния силы;

Радуйся, егоже дивному терпению содрогаются
человеческая множества.

Радуйся, непобедимый великомучениче
архидиаконе Лаврентие.

Кондак 2

Видя святейший первосвятитель Римския
церкви богомудрый Сикст, твое велие
дерзновение о Господе, святыи великомучениче
Лаврентие, возлюби тя, архидиакона своего, и
прославляя Господа воздвизающаго на тя
попечение о дому Божиим, о нищих и убогих
чадах Божиих, о всех скорбящих и озлобленных,
милости Божия и помощи требующих и имея тя
добраго делателя во храме святыни Господней,
радовашеся духом, научая и нас воспевати о
тебе благодателю нашему Богу: Аллилуиа.

Икос 2

Разум Богопросвещен имея, о доблий исповедниче Христов Лаврентие, и мира сего сладости презрев, устремился еси во след страждущаго учителя своего святаго Сикста и к нему от всея любящия души твоя взывал еси: «камо, отче, без сына грядый? Камо, о архиерею святой, спешиши без архидиакона твоего? Ты никогдаже без мене приносил еси жертву, что во мне негодно явися отеческой твоей милости? Еда ли не искусил мя еси, угодна быти тебе служителя? И аще общник бых тебе в действии Божественных таин Христовых, почто и во излиянии за Христа крове не общаюся тебе? Поими мя, отче, с тобою, сына твоего, поими, учителю, ученика твоего и даждь мя пред тобою в жертву Богу, якоже Авраам сына Исаака и яко верховный Апостол Петр перваго Архидиакона Стефана, и узрев мя совершившася мученичеством, сам послежде к венцу потщишися». Таковой любви твоей, великомучениче Христов, дивящися, умиленно вопием ти похвальная:

Радуйся, любовь к миру любовью Божиею в себе победивый;

Радуйся, крепчайшую паче огня оную любовь явивый.

Радуйся, возлюбивый всем сердцем, всею

душею, всею мыслию, всем разумом Христа – небеснаго учителя и пастыреначальника. Радуйся, такожде возлюбивый и земнаго пастыря – отца, первосвятителя твоего и наставника.

Радуйся, яко святая душа твоя серафимскою любовью пламенеющая, по апостолу: вся любит, всему веру емлет, вся уповает, вся терпит.

Радуйся, таяжде апостольския глаголы в себе вместивый, яко любы николиже отпадает.

Радуйся, непобедимый великомучениче архидиаконе Лаврентие.

Кондак 3

Силою Всевышняго укрепляеми, святии мученицы, дерзновенно проповедаху Света истиннаго Христа, Имже просвещаемии, ко славе небесней устремишася; глаголаше бо Сикст святыи диаконом и союзником своим Феликиссиму и Агапиту: «братия и своенственники мои: не убойтеся мук временных; весте кая мучения претерпеша прежде нас святии, да получат венец вечныя жизни. Сам Христос Бог наш оставил нам образ, не убойтеся убо пострадати за Христа да с ним воцаритеся». Сему убо исповеданию внемля и ты, великий страдальче Лаврентие, к достижению небесных чертогов устремился еси,

воспевая сам, и нас воздвизая пети, вся промышляющему о нас Богу: Аллилуиа.

Икос 3

Имеет весь мир христианский молитвенницы о себе святии мученицы, радостью просвещается о сем, и тебе, великий страдальче Христов Лаврентие, прославляя, воздвизает храмы имени твоему, покланяется иконам лика твоего, ведяще тя, яко усерднаго печальника и заступника и в похвалу сицевая тебе вопиет: Радуйся, земный ангеле и небесный человеце; Радуйся, мужу деланий святых. Радуйся, великий во страданиях, крепкий в терпении, мужественный в скорбех. Радуйся, мощный силою десницы Господней, дивный в подвизех, славный в родех родов. Радуйся, имже красуется доблественный мученический полк; Радуйся, егоже непобедимому терпению дивятся Ангельския горния силы. Радуйся, непобедимый великомучениче архидиаконе Лаврентие.

Кондак 4

Бурею ярости на имя Христово дышуще невернии людие, устремишася на христианы, во еже предавати их мукам лютейшим, растерзанию зверьми, усечению мечному и

огню. Ты же, великомучениче, паче оных лютейшую смерть приял еси, испечен быв огнем, аки брашно печеное, на снедь кровожадным людем, зверское существо имущим, обаче сила вражия ничтоже успе, любовию бо ко Христу пламенея, взывал еси со Апостолом: «кто ны разлучит от любве Божия, скорбь ли, или теснота, или гонение, или глад, или нагота, или беда, или меч, якоже есть писано: яко Тебе ради умерщвляеми есмы весь день, вменихомся, яко овцы заколения, но во всех сих препобеждаеми за Возлюбльшаго ны», сию убо велию любовь имети испроси и нам, угодниче Божий, научая воспевати Подвигоположнику: Аллилуиа.

Икос 4

Слышавши Сикст святой, твоя любовию понуждаемая глаголы, и духом провидя будущая, сице отвещаше тебе: «не оставляю тя, о чадо, но на множайшия муки блюду тя, предлежат бо тебе большия подвиги за веру Христову. Аз, яко стар, на легчайшее исхожду борение, тебе же подобает славнейшее показать над мучителем одоление и торжество; не плачи убо, но веждь, яко по триех днех скончания нашего, пойдеши, левите, за своим священником, не потребно есть тебе присутствия моего, аки бы каковыя помощи: Илия остави Елисея, но не отъя ему

чудодейственные силы. Иди тем временем и церковная сокровища раздаждь нищим и требующим - по твоему разсмотрению». Сие обетование и волю Архиеерея своего слышавши ты, яко послушлив архидиакон того, велиим тщанием устремися да сотвориши сия, поучая нас взывати тебе:

Радуйся, любви и веры ради за Господа и послушания Архипастырю к мучениям устремивыйся;

Радуйся, в путь узкий шедый, и прискорбный, и крест, яко ярем, взявший и Христу последовавый.

Радуйся, надеждою вечнаго покоя водимый, к борению мужественно притекший;

Радуйся, славы вечныя осияния, паче земных сластей вожделевший.

Радуйся, обещание лютейших мук, яко райския утехи сладость из уст учителя твоего услышавый;

Радуйся, яко обетованием тем утешивыйся и возвеселивыйся.

Радуйся, непобедимый великомучениче архидиаконе Лаврентие.

Кондак 5

Чудо великое помощию силы Божия действующия в тебе, по крепцей любви твоей ко Христу, сотворил еси, славный страсотерпче

Христов, егда по скончании словес архипастыря твоего и учителя ты, святой Лаврентие, якоже повествует житие твое, «вся церковная утвари и сокровища взем, искаше по всему граду крьющихся клириков и убогих христиан, и еликих обреташе, даяше им на нужныя потребности» и тамо, исцеляя вся недужныя очима и главою, чудотворец явился еси дивный во славнем житии твоём; темже и по кончине святыми мощами своими и дивными чудотворящими иконами целиши всякия недуги, ко твоему заступлению вседушно притекающих, Богу же, Подателю всякия милости, поющих: Аллилуиа.

Икос 5

Узре свет слепый Крискентион, емуже ты, помолившися, рекл еси: «Господь наш Иисус Христос, отверзый очи слепорожденному, Той да просветит тя» и сотворив, якоже глаголет житие твое, «крестное знамение на очесех слепаго, и абие той прозре, и виде лице Лаврентиево, и возрадовася». Сие бяше в дому Наркисса христианина; пре сим же, абие по речении Сикста святаго, пришедый в дом вдовы Кириакии, к горе Хелион нарицаемой, идеже мнози христианы собрашася, исцелил еси тую от болезни главы, чрез возложение рук твоих и речение: «во имя Господа нашего Иисуса Христа буди здрава», учредив убо довольны христианы

тамо, такожде и в дому Наркисса сущия, пришел еси в пещеры Непотиановы, несый крыющимся тамо христианом «яже на пищу и инья потребности», идеже бо собрани быша душ яко семьдесят и три, с ними же обрет и пресвитера Иустина. Мыслию убо и любовию, сретая тя на сем пути твоём, возглашаем тако:

Радуйся, страннолюбче, нищим и убогим богатства церковная истощивый.

Радуйся, церковная имения спасаея от неверных хищения, Церкви живой – убогим вручивый.

Радуйся, сокровищами земными небесное сокровище – славу святых приобретый.

Радуйся, нищих и убогих, в беде сущих, теми сокровищами препитавый.

Радуйся, руками убогих богатство тленное в приобретение нетленных сокровищ предпославый;

Радуйся, за страннолюбие и страдания венец нетления стяжавый.

Радуйся, непобедимый великомучениче архидиаконе Лаврентие.

Кондак 6

Проповедницы истины, богоноснии мученицы святии, сквозь огонь и воду внидоша к небесному покою, о нихже глаголати подобает словеса апостольскими, яко сии страстотерпцы велиими и неисчислимыми муками умучени «камением

побиени быша, претрени быша, искушени быша, убийством меча умроша, ихже не бе достоин весь мир». Темже убо и мы, по сему глаголу апостолу, «толик имуще облажащ нас облак свидетелей, бремя всякое отложше и удобь обстоятельный грех, терпением да течем на предлежащий нам подвиг, взирающе на Начальника веры и совершителя Иисуса», Емуже с веселием, от всего сердца нашего, возопием: Аллилуиа.

Икос 6

С светлым лицом представ судилищу Декиеву, святе Лаврентие, радовался еси грядущему венцу мученическому, паче венца мирския славы и вопрошаемь от него быв «где суть сокровища церковная», ничтоже отвецал еси безумному, подобяся Подвигоположнику Христу Богу, Иже не даде ответа вопрошавшему Его Ироду. Разгневался убо Декий, вдаде тя Валериану епарху, тойже в темницу заключи тя, идеже ты слепыя многия исцелив, подвизаеши всех верных взывати тако:

Радуйся, врачу телесных немощей;

Радуйся, ходатаю горних чертогов.

Радуйся, слепоту телесную именем Христовым исцеляяй;

Радуйся, слепоту душевную познанием истиннаго Бога отгнавый.

Радуйся, истины Христова учения среди мглы неверия и безбожия прекрасный проповедателю: Радуйся, света Евангельского во тьме и сени смертной безбожия сидящим великий показателю.

Радуйся, непобедимый великомучениче архидиаконе Лаврентие.

Кондак 7

Мира дольняго красоту, богатство и славу земную оставил еси, непобедимый воине Христов великомучениче архидиаконе Лаврентие, и к небесным горним селениям лютою стезею мучений мужественне востекл еси, идеже предстоя престолу Господа славы с лики ангельскими, поеши Ему победную песнь: Аллилуиа.

Икос 7

Егда узре Ипполит, начальник темницы, исцеленнаго тобою слепаго узника Лукиллия, егоже и крещением просветил еси, и инья многия слепцы приходившия к тебе, яко ты, по словеси жития твоего, «призывая имя Иисус Христово и руку с знаменiem крестным на очеса их возлагая, творяше их прозрети», сим убо дивяся, обаче не оставляя и заблуждения неверных, испытовше тя: «покажи мне сокровища церковная»; к нему же ты,

великомучениче, рекл еси: «О Ипполите, аще веровати будеши в Бога Отца всесильнаго и в Сына Его Господа Иисуса Христа, показано тебе будет сокровище и жизнь вечная дастся ти». Посем убо, изведен быв из темницы в дом Ипполитов и, огласив его, крести; просвещен же быв Ипполит крещением, рече: «видех души неповинныя в велицей радости», якоже повествует житие, – «то бяху сокровища, о нихже Лаврентий ему извествоваше, яко будут откровенна, в час бо крещения показа ему Господь дивным видением небесная радования»; сим обрадован Ипполит быв, приведе ко Христу весь дом свой; от негоже похваляемый, великомучениче, такожде и от нас приими сия: Радуйся, великий мучениче, Апостоле и проповедниче. Радуйся, скорый врачу, крестителю и исповедниче. Радуйся, в мучениих суций, проповеди Христовы не оставивый; Радуйся, с венцем мученика звание Апостола вместивый. Радуйся, устремляйся к мукам, дела проповедания не оставивый. Радуйся, и самыя мучения в живую проповедь славы Христовы обративый.

Радуйся, непобедимый великомучениче архидиаконе Лаврентие.

Кондак 8

Сокровищем земным прилежа, Валериан мучитель истязаше тя, святой Лаврентие, емуже ты и обещал еси показати сокровища: «даждь ми время на два или три дни и аз покажу ти сокровища». Отпущену же бывшу ти из темницы и извещенну бывшу о сем Декию Царю, ты, великомучениче, собрал еси многое множество нищих, и вдовиц, и сирот, и слепых, и хромых, и немощных в дом Ипполитов, по триех же днех, приведши оных пред лице Декия и Валериана, возва к ним: «се имате сокровища вечная в тех, ихже зрите сосудех вложенная, и кто имения своя в тыя сосуды влагает - приемлет оныя с лихвою в Небеснем Царствии». Даждь убо и нам молитвами твоими, святой великомучениче, сокровища наша земная, тленная, без сожаления влагати в таяжде честныя сосуды, чающе небеснаго воздаяния и поя Богу песнь хвалы: Аллилуиа.

Икос 8

Видяще царь Декий и Валериан епарх себе постыжденных, разгневашася зело и уже не о сокровищах тебе, святой великомучениче, истязоваху, но к поклонению идолом

привлекаху, биему убо нещадно и устрашаему
разновидными орудии мучений тебе бывшу,
взывал еси Декию: «о, окаянне, всех сих аз
давно желях, аки пиршества, то бо вам видятся
быти мучения, нам же слава»; повелевающе
мучителю, да приведеш на пиршество сие вся
христианы, глаголаше: «не достойна суть
скверная очеса ваша видети тех, ихже имена
написана суть на небесех». Биему же паки, и
опаляему, и молящуся ти уже о исходе души
твоея, слышашеся глас с небесе: «еще множае
страдати имаши», егоже аще слышаху невернии,
но не можаху уразумети откуда есть, и паки
лютейшия муки приложиша, ихже мы
вспоминая, благоговейно тебе вопием:
Радуйся, биение за Христа, нас ради биенного и
страдавшего, приемый;
Радуйся, душу твою положивый за Господа и
вечную жизнь обретый.
Радуйся, узким путем страданий вшедый в
покой небесный;
Радуйся, опаляемый огнем, угасивый вечный
огнь геенский.
Радуйся, яко непрестанно в муках моливыйся,
тем подражая в Гефсимании и на Кресте
молившемуся Господу.
Радуйся, непрестанно в молитве и любви
пламеневый, даждь и нам сей дар молитвы ко

Творцу всея твари.

Радуйся, непобедимый великомучениче архидиаконе Лаврентие.

Кондак 9

Всею душею твоею возлюбив Господа, Егоже и посреде лютых мучений, яко среди веселия, великий в мученицех Лаврентие, непрестанно прославляя еси; темже и Христос знамение силы Своея являше на тебе, посылая ангела Своего, егоже виде един от воин, именем Роман, возопи: «святый Лаврентие, вижду юношу пресветла при тебе стояща и лентием отирающа язвы и все тело твое. Заклинаю убо тя Христом Господем, пославшим тебе ангела Своего, не остави мене». Сему дивному знамению мучители не восхотеша внимати, волшебством оное разумея, и заключиша тя паки в темницу, идеже ты крестив Романа, уготови его на подвиг мучения, он же, приклонив выю свою под меч острый, взываше якоже и ты, радостно Господу песнь хвалы: Аллилуиа.

Икос 9

Вития многовещаннии не возмогут изобразити и уразумети лютейшия муки, егда, якоже глаголет житие твое, великий Лаврентие, «принесен бысть одр железный, и на том положиша мученика нага пред Декием и Валерианом, и

углие огненное подложиша, железными же вилами слуги сверху пригнетаху на одре том тело мучениково и поджигаху пекуще, аки снадное мясо». Сие страдание твое точною вспоминая, содрагаемся, и прилежно приносим ти похвальная песни сия:

Радуйся, на огни испекаемый и жегомый, огонь страстей палящий ны утоли молитвами твоими;

Радуйся, на одре железном возлегий, от одра лености предстательством твоим возстави нас.

Радуйся, лютыя страсти терпевый великодушно, от страстей облежащих ны исхити;

Радуйся, страданиями небрегий да вечную славу приобрящещи, тоя же славы улучшить и нам умоли.

Радуйся, телесными скорбями вшедый в горняя обители, и нам помози оных достигнути.

Радуйся, высоту терпения показавый, узкий и прискорбный путь терпения в житии сем нам облегчи.

Радуйся, непобедимый великомучениче архидиаконе Лаврентие.

Кондак 10

Спасти хотя душу твою, о телеси твоём небрега еси, принося себе в жертву Господу, якоже и глагола еси мучителем твоим: «аз принесох мене самаго жертву Богу моему в воню благоухания в душе сокрушенном» и, егда мучителие разжигаху

вельми одр, паки рекл еси царю: «виждь, окаянне, яко углие то огненное мне прохладу готовит, тебе же – вечныя муки, вестъ бо Господь мой, яко о святем имени Его оклеветанный - не отвергохся, вопрошенный - исповедах Его, ныне жегомый - благодарю Ему». Сицевому благодушию в лютых страданиях научи и нас, доблестный великомучениче, да достигши обетованных благих, воспоем с тобою песнь победную Христу Богу: Аллилуиа.

Икос 10

Стены безчувственныя твердее показася безбожный мучитель, повествует бо житие твое, Лаврентие славне, яко «вси тамо предстоявшии удивляхуся цареву мучительству таковому, яко жива человека испеци повеле». Ты же, великомучениче, глагола еси молитвенно: «Благодарю тя, Господи Иисусе Христе, яко укрепил мя еси», и обращся к мучителем рекл еси: «се, о окаяннии, испекосте едину тела моего страну, обратите на другую и ядите испеченное мясо мое», и паки ко Господу: «Благодарю тя, Господи Иисусе Христе, яко сподобил мя еси внити во врата Твоя» и сия рек, испусти дух. Поклоняся таковой славней кончине твоей, умиленно вопием ти: Радуйся, кончиною своею посрамивый зело мучителей твоих;

Радуйся, устыдивый вельми беззаконующих.
Радуйся, кротким терпением твоим удививый
все естество человеческое.

Радуйся, в терпении сем явивый себе, яко
безтелесна, подобна горним силам.

Радуйся, благодарственно вся терпевый, живота
вечнаго явился еси славный наследник.

Радуйся, подвигом добрым подвизавыйся,
показался еси вечныя славы сопричастник.

Радуйся, непобедимый великомучениче
архидиаконе Лаврентие.

Кондак 11

Песнь исходную первее принесе тебе, страдальче
Лаврентие, Ипполит темничник, крещенный
тобою, иже похити в ту ночь тело твое и
плащаницею со ароматы обви е и со Иустином
пресвитером принесе в дом Кириакии вдовицы,
пребыв в той день в пощении со слезами, в
вечер же глубок, якоже повествует житие твое,
«мощи твоя несоша в пещеру, яже на селе вдовы
тоя. Собравшимся же многим христианом, и
плачущим много, сотворивше тамо всенощная
моления, погребоша честно мученика, а святой
Иустин пресвитер и вси прочии быша
причастницы пречистых Таин Тела и Крови
Христовых». Воспоминающе сие и мы, вместо
мира - слезы молитвы принесем тебе и песнем

исходным воздыханьми подражая, воспоем о тебе Богу: Аллилуиа.

Икос 11

Свет Христов, просвещаяй и освящаяй всяческая, озари душу твою, богомудрый великомучениче, темже и по кончине твоей честныя мощи и иконныя подобия лика твоего неоскудно источают исцеления, утешение и радость всем болящим, скорбящим и унылым, подвизая оных подражати тебе во исповедании, терпении, мужестве и крепцей любви ко Христу, еюже пламенея, дивный образ терпения в злостраданиих явил еси и нас научаеши воспевати тебе тако:

Радуйся, велию любовь и веру ко Христу до последняго издыхания сохранивый.

Радуйся, в любви сохранивый веру, верою стяжавый мужество и теми козни вражия победивый.

Радуйся, путем тесным в горняя восшедый;

Радуйся, праведным житием обители вечныя достигший.

Радуйся, в мире живый, надмирную красоту очами духовными созерцавый;

Радуйся, Рима великаго и мира всего славо и украшение.

Радуйся, непобедимый великомучениче архидиаконе Лаврентие.

Кондак 12

Благодать данную ти от Господа в земнем житии твоём, святой великомучениче, во еже исцеляти недужныя почитая, веруем, яко и по смерти ты целиши с верою приходящих ко всечестным мощем твоим и прославленным Божественною благодатию иконам; уповаем же, угодниче Божий, яко исцеляя телесныя очи прибегающих к тебе недужных, вкупе просвещаеши и душевныя очеса и ныне, якоже и древле, научая просвещенныя тобою воспевати Творцу всяческих: Аллилуиа.

Икос 12

Поюще твоя великая страдания, Лаврентие, великий Христов угодниче, хвалим твое непостижимое нам немощным долготерпение, ублажаем твердое исповедание Христово и, почитая священную и славную память твою, заступниче наш и целителю, ведаем, яко по слову псалмопевца, «в память вечную будет праведник». Темже любовью прославляя тя, от чистаго сердца и благоговейныя души, устнами, аще и грешными, но усердными, вопием со умилением сице:

Радуйся, даров великих Божиих присный нам ходатаю;

Радуйся, преизящный угодниче и непобедимый в мучениих страсотерпче.

Радуйся, крепким терпением стяжавый душу твою, оным терпением и нам явивый образ спасения вечнаго;

Радуйся, тем же терпением мучителю дерзость победивый, научая оным и нас побеждати дерзость исконнаго врага нашего.

Радуйся, в том же терпении себе равнаго серафимам безплотным явивый;

Радуйся, сим величайшим терпением звание непобедимаго от всех родов христианских получивый.

Радуйся, непобедимый великомучениче архидиаконе Лаврентие.

Кондак 13

О великий, всехвальный, непобедимый во страданиях великомучениче и архидиаконе Лаврентие, прими от всея души нашея сия похвалы тебе возносимыя, и нас, чающих милости Божия, помощи и спасения, от всяких бед, болезней и зол соблюди; воздыханий наших в болезнях и скорбех не презри, слезы наши собери и престолу Утешителя Господа принеси, в час же кончины нашея предстани нам и престолу Господа славы нас представи воспети Ему в горних селениях песнь Ангельскую:
Аллилуиа.

Сей Кондак глаголи трижды, посем Икос 1 и Кондак 1

МОЛИТВА

О всесвятый и предивный Страстотерпче Христов, архидиаконе Лаврентие! Восхваляя веру и страдания твоя, почитаем победу и венценосное прехождение твое чрез горящее углие от тьмы века сего ко свету невечернему престола величества Божия. Тем убо молим тя: якоже утвердил еси миром и чудесы притекающих с верою к покрову твоему в бедах и напастех, Ангел сый во плоти, тако да приимеши и нас под кров твой в болезнях и печалех наших, и якоже исцелил еси Крискениона приложением рук от слепоты телесных очес его и множайшими чудесы удивил еси прибегающих к тебе, тако да исцелиши предстательством ныне у престола Божия и нашу душевную слепоту; призри на всякое расслабление наше телесное и укрепи нас бодренностью противу врагов наших видимых и невидимых, удручающих нас выну бедами и напастями, да путь маловременной жизни сей прешед неискушенны от бед, скорбей и всякаго лютаго обстояния, достигнем тобою и мы неприступныя славы величества Божия, идеже предстоиши, моля со дерзновением за люди прибегающия с верою к тебе, воспевая дивнаго во святых Своих Бога во веки веков. Аминь.